

Sellemols – Die Scheernschleifer oder „Damals“ für Nicht-Odenwälder



Fortbewegungsmittel und Werkstatt in einem: Das Fahrrad eines Scherenschleifers.

Heit will ich mol kurz an die Scheernschleifer erinnern, die wo frieher – so in de 50er un aofangs de 60er Jaorn – uff die Orde gekumme sin. Die sin midd em Faohrraad kumme. Vorne uff em Lenker hadde die en Schlaafstao, von dem hawwe se en Aotriebsrieme an die Hinnerachs´gelegt un ier Faohrraad hinne uffgebockt, sich druffgehockt und gedräade. Do ist es Schlaafstaoche gelaafe. Es Wasser hawwe se eufach druffgespuckt. Fer e paar Fennich hawwe die die Scheern un Messer geschliffe und dann am Wetzstao abgezoe. Allzuvviel konnde die net verdiene, weil viele Leit selwer en Schlaafstao hadde und aach selwer geschliffe hawwe. Dann hatt dess mit denne Scheernschleifer aa bald uffgeheert. Do fellt mer noch was eu: Lumbesammler hot´s domols aa gäwwe. Sie hawwe Lumbää-aold- Eisää gekrische, bloß hadde se kao Lastaudo, erst späder! Do sin als en äldere Mann un e Fraa mit em Gailche un em klaone Wäijelche gekumme. Sie hadde hinnedruff en Korb mit Holzwooll stäije. Wann mer denne e poor Lumbe gegäwwe hot, hdd aom die Fraa aus demm Korb en schäine bundische Kaffeekumbe odder e Glasdellerche rausgezoe. Do driwwer hawwe mir Kinner uns g´fraad. Heit kriggt mer von denne Krageeler nix mäih, die mache dich heit noch weis, sie deen der en G´falle, wann se deu aold Eise mitnemme. - Na ja, dann muss mer´s halt net uff de Bauhof faorn. Jetzt falle mer aach noch die Hausierer eu. Do gäbs aach was zu erzäale. Vielleicht es nexte Maol!

Mehr zum Thema in: Sauerwein, Friedrich „Vadder, ve´zähl emol“

Hans-Edgar Bickelhaupt, Arbeitskreis Heimatgeschichte Mühlthal